

III. OUTRAS DISPOSICIÓN

CONSELLERÍA DO MEDIO RURAL

ORDE do 3 de maio de 2017 pola que se establecen as bases reguladoras das axudas para o fomento da contratación dos seguros agrarios na Comunidade Autónoma de Galicia e se convocan para o ano 2017.

Coa finalidade de que un maior número de agricultores e gandeiros poidan beneficiarse das vantaxes que supoñen os seguros como un instrumento que lles permite fazer fronte ás perdas económicas que poidan ter nas súas producións como consecuencia da actuación de axentes alleos, como o clima, as enfermidades e outros, o Decreto 332/1995, do 27 de decembro, establece para a Comunidade Autónoma de Galicia as axudas para o fomento da contratación dos seguros agrarios.

En aplicación do dito decreto, tendo en conta a evolución da contratación de seguros agrarios nas últimas campañas, as recomendacións da Comisión Europea, en canto a contías máximas de subvención por tipos de seguros e coberturas, a Lei 9/2007, do 13 de xuño, de subvencións de Galicia, o Real decreto 425/2016, do 11 de novembro, e o trixésimo oitavo Plan de seguros agrarios combinados (Plan 2017), cómpre regular, mediante esta orde, determinados aspectos das axudas para fomentar a contratación de seguros agrarios durante o ano 2017.

Conforme o previsto no artigo quinto do título II da Lei 87/1978, do 28 de decembro, de seguros agrarios combinados, a Entidade Estatal de Seguros Agrarios elabora o Plan de seguros agrarios combinados (Plan 2017), que cumpre co establecido nas directrices da Unión Europea aplicables ás axudas estatais nos sectores agrícola e forestal e nas zonas rurais de 2014 a 2020 (2014/C 204/01) e tendo sido recoñecido como compatible co mercado interior comunitario en virtude das decisións da Comisión Europea do 9 de abril de 2015 e do 28 de agosto de 2015 (Axuda nº SA.42697 (2015/N)). A concesión de subvencións para contratar pólizas de seguros acuícolas cumpre co establecido no Regulamento (UE) nº 1388/2014 da Comisión, do 16 de decembro, polo que se declaran determinadas categorías de axudas a empresas adicadas á producción, transformación e comercialización de produtos da pesca e a acuicultura, compatibles co mercado interior en aplicación dos artigos 107 e 108 do Tratado de funcionamento da Unión Europea.

O trixésimo oitavo Plan de seguros agrarios combinados aprobado por Acordo do Consello de Ministros do 16 de decembro de 2016, publicado no BOE do sábado, 24 de



decembro, por Resolución do 19 de decembro da Subsecretaría de Agricultura e Pesca, Alimentación e Medio Ambiente, establece as distintas porcentaxes de subvención que corresponden á Administración do Estado, que achegará a propia Enesa, e que se aplicarán nos diferentes grupos de liñas de seguro. No Plan, así mesmo, fíxanse os criterios para a asignación das subvencións, os estudos de viabilidade e condicións de cobertura, as novas liñas de seguro ou garantías adicionais que se poden incorporar como novedades, a elaboración e a revisión das normas de peritación, as datas de subscrición e os prazos de elaboración de cada seguro, así como outras cuestións relacionadas co plan.

Mediante esta orde, e en desenvolvemento do previsto no Decreto 332/1995, do 27 de decembro, a Comunidade Autónoma de Galicia participará nas subvencións que financien as pólizas de seguro que se prevexan no Plan anual estatal, co fin de fomentar a contratación de seguros agrarios.

As liñas de actuación estarán orientadas á consecución dos obxectivos seguintes:

1. Progresar no deseño das actuais liñas do seguro cara a un modelo onde se permita a flexibilización e elección de coberturas polo asegurado, respectando a viabilidade técnica das coberturas ofrecidas.
2. Revisar os criterios de asignación de subvencións, adecuándoos á dispoñibilidade orzamentaria, optimizando os recursos e facilitando a súa aplicación, xestión e control.
3. Fomentar o deseño de liñas de seguro renovables para mellorar a implantación do seguro e a súa universalización.

O Plan 2017 incluirá a totalidade das liñas de seguros que se recollen nos anexos I e II, así como as seguintes garantías:

- Continuarase atendendo á revisión das coberturas das diferentes liñas de seguro para favorecer a súa adaptación ás condicións reais do cultivo, ás características do risco, ao destino das producións, ao tamaño e estrutura da explotación, ás técnicas de prevención do risco e aos resultados actuariais do aseguramento.
- Tendo en conta o anterior, os anexos I e II recollen, para cada liña de seguro, a relación das producións asegurables que definen as liñas de aseguramento que integran o 38º Plan de seguros agrarios combinados, sen prexuízo de que, froito da análise específica de cada liña de seguro, poida darse cobertura a novas producións e garantías.



– Para as liñas de aseguramento agrícolas, contidas no punto 1 do anexo I, os riscos asegurables (variables en función da producción, o ámbito e o módulo de aseguramento) son: sarabia, xeada, neve, choiva, inundación, vento, incendio, fauna, non nascencia, falta de callado, virose, golpe de calor, baleirado en sandía e resto de adversidades climáticas. Así mesmo, na liña de seguro para organizacións de produtores e cooperativas é asegurable o prexuízo económico que representa ao facer fronte aos custos fixos dos bens asegurables cando se produciu unha diminución de entrada de producción na organización ou cooperativa por riscos asegurados. Para as instalacións quedan cubertos a totalidade de riscos meteorolóxicos.

– Para as liñas de aseguramento gandeiras contidas no punto 2 do anexo I, os riscos asegurables (variables en función da especie animal, o réxime de manexo e as garantías opcionais elixidas) son: adversidades meteorolóxicas (incendios, inundacións, raios, seca, golpe de calor, vento tempestuoso, choiva torrencial, neve, etc.), ataque de animais salvaxes ou cans asilvestrados, accidentes, morte masiva, período improdutivo por morte masiva, mortalidade por calquera causa, enfermidades que inclúen as principais epizootias que afectan a cada especie (como febre aftosa, EEB, tremedeira, peste equina, febre do Nilo Occidental, peste porcina clásica, enfermidade de Aujeszky, influenza aviaria, enfermidade de Newcastle, salmonela, etc.), así como outras enfermidades non epizoóticas (carbúnculo, síndrome respiratoria bovina, Actinomicosis e Actinobacilosis, mamitis, meteorismo, etc.), intoxicacións, saneamento gandeiro oficial e gastos derivados da retirada e destrucción de animais mortos na explotación.

Ademais, proseguirase coas actuacións que se veñen desenvolvendo en orden ao perfeccionamento técnico das diferentes liñas de aseguramento, traballando especialmente en consolidar e completar os procesos de deseño das liñas, favorecendo a súa adaptación ás condicións reais do cultivo, ás características do risco, ao destino das producións, ao tamaño e estrutura da explotación, ás técnicas de prevención do risco e aos resultados actuariais do aseguramento, prestando especial atención aos seguintes aspectos:

- a) Actualizar as bases de datos de rendementos das liñas de seguros que o requiran.
- b) Avanzar no desenvolvemento dos seguros, de conformidade co punto 1 anterior, permitindo unha flexibilización e elección de coberturas, adaptándose ás necesidades dos asegurados, o que se fará respectando a viabilidade técnica.
- c) Avanzar no desenvolvemento da modalidade de aseguramento renovable como contribución á simplificación do proceso de contratación e á fidelización dos produtores.



d) Perfeccionar a garantía morte de crías na liña de seguro de explotación de gando vacún de reproducción y producción, ampliando a unha nova opción elexible que cubra a morte das crías nas primeiras 24 horas tras o parto.

e) Implementar o novo mapa de aproveitamento de pastos que sirve de base ao seguro de compensación por perda de pastos.

f) Adaptar a garantía de desabellado repentino por abellaruco no seguro de explotación de apicultura aos novos estudos realizados sobre a materia.

No ano 2017 recibirán subvención, por parte da Consellería do Medio Rural, as liñas de seguros indicadas nos anexos.

En virtude do exposto, e de conformidade co artigo 30.I.3 do Estatuto de autonomía de Galicia, e no uso das facultades que me confiren os artigos 7 e 14 da Lei 9/2007, do 13 de xuño, de subvencións de Galicia,

DISPOÑO:

Artigo 1. Obxecto e beneficiarios

1. O obxecto desta orde é establecer as bases reguladoras das axudas para o fomento da contratación dos seguros agrarios incluídos no Plan de seguros agrarios combinados para o exercicio 2017 e convocalas para o mesmo ano, ao abeiro do previsto no Decreto 332/1995, do 27 de decembro, polo que se establecen na Comunidade Autónoma galega axudas para o fomento da contratación dos seguros agrarios.

2. A Consellería do Medio Rural concederá estas axudas en forma directa aos agricultores, tal como establece o artigo 22.2.b) da Lei 38/2003, do 17 de novembro, xeral de subvencións, así como o artigo 19.4 da Lei 9/2007, do 13 de xuño, de subvencións de Galicia, e poderán ser beneficiarios delas os asegurados titulares de explotacións agrarias situadas no ámbito da Comunidade Autónoma de Galicia, e sempre que subsciban pólizas de seguros de liñas agrícolas do Plan 2017 e liñas gandeiras dos plans 2016 e 2017, formalizadas no 2017, e cumpran o establecido no Decreto 332/1995 e nesta orde. Tamén poderán ser beneficiarios das axudas outorgadas nesta orde os titulares de explotacións de acuicultura continental.

3. As subvencións a que fai referencia esta orde non serán de aplicación nas pólizas de seguros contratadas por grandes empresas e empresas dedicadas á transformación



e comercialización de produtos agrícolas, de conformidade co establecido nas vixentes directrices comunitarias sobre axudas estatais ao sector agrario e forestal.

Para os efectos de identificar as grandes empresas, terase en conta a definición de pequena e mediana empresa contida no anexo I do Regulamento (UE) nº 702/2014 da Comisión, do 25 de xuño, polo que se declaran determinadas categorías de axuda nos sectores agrícola e forestal e en zonas rurais compatibles co mercado interior en aplicación dos artigos 107 e 108 do Tratado de funcionamento da Unión Europea.

4. As subvencións establecidas nesta orde non serán de aplicación nas pólizas de seguros contratadas por asegurados que, de acordo co artigo 2 da Lei 40/2015, do 1 de outubro, de réxime xurídico do sector público, teñan a consideración de administracións públicas.

Artigo 2. *Entidades aseguradoras autorizadas*

1. A subscrición do seguro realizarase exclusivamente a través das entidades aseguradoras autorizadas polo Ministerio de Economía e Competitividade e incluídas na Agrupación Española de Entidades Aseguradoras dos Seguros Agrarios Combinados, S.A. (Agroseguro), ou a través dos axentes de seguros autorizados, de conformidade co previsto na Lei 87/1978, do 28 de decembro, de seguros agrarios combinados, e demais normativa de desenvolvemento.

2. A contratación con estas entidades poderase realizar de forma individual ou ben de forma colectiva por medio de tomadores de seguros. Non obstante, soamente aqueles tomadores que se inscriban no Rexistro de Tomadores da Entidade Estatal de Seguros Agrarios (Enesa) poderán percibir as subvencións públicas adicionais que por contratación colectiva se establezan.

Artigo 3. *Liñas de seguros subvencionables e contía das axudas*

1. Para o ano 2017 a subvención da Consellería do Medio Rural para todas as liñas de contratación establecidas nos anexos I e II que se xuntan a esta orde, incluídas as modalidades de renovables, unha porcentaxe sobre a prima comercial base, incluídas bonificacións e recargas, segundo se indica nos ditos anexos.

2. A concorrencia das axudas das administracións públicas non superará as porcentaxes máximas establecidas nas directrices comunitarias sobre axudas estatais ao sector



agrario para atender posibles perdas causadas por desastres naturais, acontecimentos de carácter excepcional, fenómenos meteorolóxicos adversos asimilables a desastres naturais, enfermedades animais, pragas vexetais e retirada e destrucción de gando morto. Para asegurar o cumprimento desta normativa, as subvencións terán os seguintes límites:

a) A subvención conxunta entre Enesa e a Consellería do Medio Rural non poderá exceder os límites xenéricos seguintes:

– Para as liñas de seguros agrícolas establecérese un límite do 65 % do recibo de prima, sen ter en conta as recargas por contratación.

– Para as liñas de seguros de explotacións gandeiras e acuícolas establecérese un límite do 65 % do recibo de prima, sen ter en conta as recargas por contratación.

b) No caso dos seguros de retirada e destrucción de animais mortos nas explotacións, a subvención conxunta entre Enesa e a Consellería do Medio Rural non poderá exceder o límite xenérico do 80 % do recibo de prima, sen ter en conta as recargas por contratación.

3. Para o cálculo do importe definitivo de subvención, ás cantidades que resulten de aplicar as porcentaxes do número 1 e os límites impostos no número 2 deste artigo, restáselle a cantidad de 15 euros. Non se concederá ningunha subvención a aquellas solicitudes en que este cálculo resulte igual ou inferior a esta cantidad.

Artigo 4. *Procedemento e prazos de execución*

1. A formalización da correspondente póliza ou contrato de seguro pola persoa asegurada considerarase solicitude de axuda, sempre que se realice dentro dos períodos de subscrición establecidos pola normativa do plan anual vixente establecido polo Ministerio de Agricultura e Pesca, Alimentación e Medio Ambiente, a persoa asegurada achegue previamente toda a información esencial para que a devandita formalización sexa efectiva, así como a documentación xustificativa requirida no momento da contratación e, ademais, se cumpran os distintos puntos referentes á subvención que se conteñan na declaración do seguro. En todo caso, na declaración do seguro especificarase, na parte de subvencións para comunidades autónomas, a expresión literal de «subvención da Comunidade Autónoma de Galicia».



2. A contratación da póliza de seguro constitúe unha declaración do asegurado de que reúne os requisitos exixidos nas normas reguladoras sobre subvencións e axudas públicas, de acordo cos artigos 10 e 11 da Lei 9/2007, do 13 de xuño, de subvencións de Galicia, de que non foi obxecto de resolución administrativa ou xudicial firme de reintegro ou que, de ser o caso, se realizou o correspondente ingreso, e que dispón dos documentos que xustifican o cumprimento dos requisitos exixidos nesta orde para a concesión das subvencións.

En aplicación da dita Lei 9/2007, do 13 de xuño, de subvencións de Galicia, a contratación da póliza de seguro polo solicitante implica a autorización deste para que o órgano concedente obteña de forma directa a acreditación do cumprimento dos ditos requisitos a través de certificados telemáticos, salvo denegación expresa daquel. Para iso, segundo se recolle nos artigos 16 e 17.4 e no anexo III do Real decreto 425/2016, do 11 de novembro e no artigo 7.3 desta orde, a Consellería do Medio Rural establece un convenio de colaboración con Enesa para o intercambio da información da Base de datos de control integral de acceso a subvencións (CIAS).

3. No caso daquelas pólizas de seguro correspondentes á modalidade «renovable», terá a consideración de solicitude de subvención a póliza de seguro inicialmente subscrita mediante a formalización da declaración do seguro, conciuntamente co recibo de pagamento da correspondente anualidade. Neste senso, presumirase que o pagamento do recibo da póliza constitúe a manifestación da aceptación das condicións do seguro e de reunir os requisitos para a percepción das subvencións correspondentes.

4. As datas de inicio e o prazo de subscrición e formalización da correspondente póliza de seguro sinálanse de forma particular para cada liña de contratación no Plan anual para o ano 2017, onde constan as datas de inicio para a subscrición das pólizas de seguro de que se trate.

5. O importe da axuda que corresponda á Consellería do Medio Rural deducirse do importe da prima que aboen o tomador ou o asegurado no momento da subscrición da póliza. As cantidades así descontadas pagarallas a Consellería a Agroseguro contra as certificacións de liquidacións, sempre de acordo co procedemento establecido no correspondente convenio de colaboración subscrito entre a Consellería e Agroseguro.

6. No dito convenio establecense os prazos e a documentación que Agroseguro deberá xuntar a cada certificación de liquidación co fin de que se poidan efectuar as comproba-



cíons oportunas para a resolución por parte da Consellería do Medio Rural, antes de realizar os correspondentes pagamentos da axuda a Agroseguro.

7. O órgano competente para a tramitación do procedimento de concesión das subvencións será a Dirección Xeral de Gandaría, Agricultura e Industrias Agroalimentarias.

8. Dentro das dispoñibilidades orzamentarias, unha vez efectuadas as comprobacións necesarias das certificacións de liquidacións presentadas por Agroseguro, a conselleira do Medio Rural, logo da proposta do/da director/a xeral de Gandaría, Agricultura e Industrias Agroalimentarias, ditará a correspondente resolución de disposición de gasto e proposta de pagamento no prazo máximo de cinco meses contados desde a presentación da solicitude.

9. As resolucións expresas ou presuntas ditadas en aplicación desta orde esgotan a vía administrativa e contra elas poderase interpoñer potestativamente recurso de reposición ante a conselleira do Medio Rural. Se o acto fora expreso, o prazo para presentar o recurso de reposición será dun mes. Se o acto non fora expreso, a persoa solicitante e outras posibles interesadas poderán interpoñer o recurso de reposición en calquera momento a partir do día seguinte a aquel no que se produza o acto. En calquera caso, as resolucións poderán ser impugnadas directamente ante o órgano xurisdiccional contencioso-administrativo competente no prazo de dous meses, contados a partir do día seguinte ao da súa notificación.

Artigo 5. Obrigas dos beneficiarios e tomadores dos seguros

1. Os tomadores dos seguros e, de ser o caso, os asegurados beneficiarios achegarán unha lista resumo das pólizas subscritas, así como toda aquela documentación relacionada coa contratación do seguro, sempre que así lles sexa exixida expresamente pola Dirección Xeral de Gandaría, Agricultura e Industrias Agroalimentarias. Así mesmo, aqueles terán a obriga de facilitar toda a información que lles sexa requirida pola Intervención Xeral da Comunidade Autónoma, polo Tribunal de Contas e polo Consello de Contas no exercicio das súas funcións de fiscalización e control do destino das axudas públicas.

2. Na formalización do seguro, os beneficiarios das axudas farán constar as axudas solicitadas ou concedidas polas distintas administracións públicas competentes para a mesma finalidade.



3. O incumprimento das obrigas sinaladas nos dous puntos anteriores poderá supor a perda total ou parcial da axuda, así como a obriga de restituír as cantidades percibidas, sen prexuízo doutras responsabilidades en que puideren incorrer os beneficiarios ou perceptores.

4. Os asegurados, polo feito de contrataren a póliza do seguro agrario, autorizan á Consellería do Medio Rural, para que, en caso necesario, e co obxecto de verificar o cumprimento dos requisitos exixidos nesta orde, poida solicitar a cesión de información a outras administracións, por medios informáticos ou telemáticos, sobre a circunstancia de estaren ou non ao día nas súas obrigas tributarias, así como calquera outra información que permita certificar o cumprimento dos requisitos exixidos para a obtención das subvencións reguladas nesta orde.

5. A formalización da póliza constitúe unha autorización para poder obter de Agroseguro a información sobre os sinistros acontecidos nas explotacións aseguradas e outros datos relevantes sobre a xestión da póliza, segundo se fai constar no documento de aseguramento que se asina para a súa formalización.

6. Nos seguros de gando, no caso de cesar a actividade para a cal se subscribise o seguro antes de rematar o prazo de garantías, é obligatorio comunicar á compañía aseguradora a fin da actividade co fin de que, se é o caso, a Consellería do Medio Rural poida recuperar a parte de subvención non empregada.

Artigo 6. *Modificación da resolución de concesión e infraccións administrativas*

Toda alteración das condicións que se tiveron en conta para a concesión da axuda e, en todo caso, a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais, poderá dar lugar á modificación da resolución de concesión da axuda.

Artigo 7. *Control das axudas*

1. A Consellería do Medio Rural establecerá os controis administrativos e de campo precisos para asegurar que se cumpren os requisitos establecidos nesta orde.

2. Para os efectos do control das subvencións reguladas nesta orde, o tomador do seguro, no caso de pólizas de contratación colectiva, ou o asegurado, no caso de pólizas individuais, serán responsables das infraccións administrativas en materia de subvencións



e estarán suxeitos ás sancións reguladas ao respecto, recollidas na Lei 9/2007, do 13 de xuño, de subvencións de Galicia.

3. Con obxecto de mellorar o sistema de control de subvencións, de acordo cos artigos 16 e 17.4 e o anexo III do Real decreto 425/2016, do 11 de novembro, a Consellería do Medio Rural establece un convenio de colaboración con Enesa para o intercambio de información, relativa ás pólizas contratadas, da Base de datos de control integral de acceso a subvencións (CIAS).

Artigo 8. *Reintegro das axudas*

No caso de pagamentos indebidos, así como nos demais casos determinados no artigo 33 da Lei 9/2007, do 13 de xuño, de subvencións de Galicia, os beneficiarios ou perceptoras das axudas quedarán obrigados ao reembolso do importe indebidamente percibido, xunto cos xuros de demora producidos desde o pagamento, sen prexuízo doutras responsabilidades ás que houber lugar segundo os artigos 37, 38, 39 e 40 da dita lei.

Artigo 9. *Financiamento*

Para a concesión das axudas reguladas nesta orde existe crédito adecuado e suficiente con cargo á aplicación orzamentaria 2017 13 03 712B 7720 (proxecto económico 2009.00695) da Lei 1/2017, do 8 de febreiro, de orzamentos xerais da Comunidade Autónoma de Galicia para o ano 2017, por un importe total de 4.620.845,00 euros, que poderá verse incrementado con outros remanentes orzamentarios.

Disposición adicional primeira. *Norma que se observará no non previsto nesta orde*

No non previsto nesta orde observarase o disposto na Lei 9/2007, do 13 de xuño, de subvencións de Galicia, no Decreto 11/2009, do 8 de xaneiro, polo que se desenvolve o regulamento da dita lei e no Real decreto 425/2016, do 11 de novembro, polo que se establecen as bases reguladoras para a concesión de subvencións da Administración Xeral do Estado ao Seguro Agrario, así como no Plan 2017 de seguros agrarios combinados.

Disposición adicional segunda. *Publicación da concesión de axudas*

Sen prexuízo da súa publicación no *Diario Oficial de Galicia*, e de conformidade co artigo 17 da Lei 1/2016, do 18 de xaneiro, de transparencia e bo goberno, e co artigo 15 da Lei 9/2007, do 13 de xuño, de subvencións de Galicia, a consellería publicará na súa páxina web oficial as concesións das axudas ou subvencións reguladas nesta orde, polo



que a presentación da solicitude leva implícita a autorización para o tratamento necesario dos datos na citada páxina web.

Ademais, en virtude do disposto no artigo 4 da Lei 1/2016, do 18 de xaneiro, de transparencia e bo goberno, as persoas físicas e xurídicas beneficiarias de subvencións están obrigadas a subministrar á Administración, ao organismo ou á entidade das previstas no artigo 3.1 da mesma lei, á que se atopen vinculadas, previo requerimento, toda a información necesaria para o cumprimento por aquelas das obrigas previstas no título I da citada lei.

Disposición adicional terceira. *Base de datos nacional de subvencións*

En cumprimento do disposto no artigo 20 da Lei 38/2003, do 17 de novembro, xeral de subvencións, o texto da convocatoria e a información requirida no ordinal oitavo do devandito artigo será comunicado á Base de datos nacional de subvencións (BDNS). A BDNS dará traslado ao *Diario Oficial de Galicia* do extracto da convocatoria para a súa publicación.

Disposición derradeira. *Comezo de efectos*

Esta orde terá efectos o día seguinte ao da súa publicación no *Diario Oficial de Galicia*.

Santiago de Compostela, 3 de maio de 2017

Ángeles Vázquez Mejuto
Conseleira do Medio Rural

ANEXO I
Porcentaxes de subvención base aplicables

1. Seguros de producións agrícolas.

Establécese unha subvención do 22 % sobre a prima comercial base, incluídas bonificacións e recargas, para todas as producións agrícolas.

| Liñas de seguro | Producións asegurables | Data inicio subscrición |
|---|--|-------------------------|
| Explotacións de cereixa. | Cereixa. | 1 de xaneiro |
| Organizacións de Produtores e Cooperativas. | Cereixa, cítricos, cultivos herbáceos extensivos, caqui e outros frutais, fresón e outros froitos vermellos, frutais, froitos secos, hortalizas, olivas, producións tropicais e subtropicais, uva de mesa, uva de vinificación e tabaco. | 1 de xaneiro |



| Liñas de seguro | Produccións asegurables | Data inicio subscrición |
|---|--|-------------------------|
| Hortalizas ao aire libre, de ciclo primavera-verán. | Chicoria de raíz, berenxena, cabaciña, cabaza, calçot, cebola, ceboliña, charouví, chufa, feixón verde, melón, nabo, cogombro, cogombro novo, pemento, porro, ravo, remolacha de mesa, sandía, tomate e cenoria. | 15 de xaneiro |
| Explotacións hortícolas en ciclos sucesivos. | Acelga, chicoria de folla verde, apio, baby leaf, berza, bimi, borraxe, brócoli, coles de Bruxelas, col-repolo, coliflor, escarola, espinaca, grelos, fiuncho, hortalizas orientais, leituga, romanesco e aromáticas culinarias. | 15 de xaneiro |
| Explotacións de cultivos industriais non téxtils. | Durmideira, alcaparra, aloe vera, anís, azafrán, cana de azucré, lavanda, lavandín, lúpulo, vimbio, regalicia, remolacha azucreira, resto de aromáticas, resto de medicinais e tabaco. | 1 de febreiro |
| Explotacións de cultivos industriais téxtils. | Algodón, cánabio téxtil e liño téxtil. | 1 de febreiro |
| Explotacións de planta viva, flor cortada, viveiros e sementes. | Planta viva; flor cortada; viveiros de: vide, cítricos, froiteiros tropicais e subtropicais, froiteiros de froito seco, resto de froiteiros, amorodo e fresón, olivar, plantas aromáticas, resto de especies e resto de viveiros; producción de sementes hortícolas. | 1 de febreiro |
| Explotacións de multicultivo de hortalizas. | Todas as hortalizas. | 1 de marzo |
| Explotacións de cítricos. | Laranxa, mandarina, limón, lima e pomelo. | 1 de abril |
| Explotacións hortícolas baixo cuberta. | Todas as producións hortícolas. | 1 de xuño |
| Explotación de fresón e outros froitos vermellos. | Arándano, framboesa, amorodo, fresón, grosella e moura. | 1 de xuño |
| Explotacións de hortalizas ao aire libre, de ciclo outono-inverno. | Faba verde, chícharo verde, alcachofa, cardo, espárrago, allo, «ajete», pataca, batata, boniato. | 1 de xuño |
| Explotacións de caqui e outros froiteiros. | Caqui, kiwi, néspera, abruñeiros, granado, figueira, castaño, azufaifo e marmeleiro. | 1 de setembro |
| Explotacións de froitos secos. | Amendoeira, abeleira, alfarrobeira, nogueira e pistacho. | 1 de setembro |
| Explotacións de cultivos herbáceos extensivos. | Cereais de inverno, cereais de primavera, arroz, leguminosas gran, oleaxinosas e palla de cereais de inverno. | 1 de setembro |
| Explotacións olivareiras. | Oliva. | 1 de setembro |
| Seguro base (SB) con garantías adicionais (GA) para uva de vinificación en península. | Uva de vinificación. | 1 de outubro |
| Explotacións frutícolas. | Albaricoque, ameixa, mazá, mazá de sidra, melocotón e pera. | 15 de novembro |
| Explotacións de cultivos forraxeiros. | Cultivos forraxeiros, palla de cereais de inverno e pastos aproveitables a dente. | 15 de novembro |
| Explotacións de cultivos agroenerxéticos. | Cultivos anuais ou plurianuais destinados á producción de biocombustibles sólidos lignocelulósicos para la producción de enerxía. | 15 de novembro |



2. Seguros de producións gandeiras: seguros de explotación.

Establécese unha subvención do 16 % sobre a prima comercial base, incluídas bonificacións e recargas.

| Liñas de seguro | Data inicio subscrición |
|--|-------------------------|
| Seguro de explotación de gando vacún de reproducción e producción. | 1 de xuño |
| Seguro de explotación de gando vacún de cebo. | 1 de xuño |
| Seguro de explotación de gando vacún de lidia. | 1 de xuño |
| Seguro de explotación de gando ovino e caprino. | 1 de xuño |
| Seguro de explotación de gando equino. | 1 de xuño |
| Seguro de explotación de gando aviar de carne. | 1 de xuño |
| Seguro de explotación de gando aviar de posta. | 1 de xuño |
| Seguro de explotación de gando porcino. | 1 de xuño |
| Tarifa xeral gandeira. | 1 de xuño |
| Seguro de compensación por perda de pastos. | 1 de xullo |
| Seguro de explotación de apicultura. | 1 de outubro |

3. Seguros de producións acuícolas.

Establécese unha subvención única por póliza do 16 % sobre a prima comercial base, incluídas bonificacións e recargas.

| Liñas de seguro | Data inicio subscrición |
|------------------------------------|-------------------------|
| Seguro de acuicultura continental. | 1 de xuño |

ANEXO II Subvención única por especie (Seguro de retidada e destrucción de animais mortos na explotación)

| Liñas de seguro | Producción asegurable | Data inicio subscrición | Subv. CA Galicia (%) |
|--|--|-------------------------|----------------------|
| Seguro para a cobertura dos gastos derivados da retirada e destrucción de animais mortos na explotación. | Bovina, ovina e caprina, porcina, aviar, equina, piscícola e acuícola, cérvidos e camélidos. | 1 de xuño | 28 |
| | Cúnica. | 1 de xuño | 40 |

